

**Hisham: Suara Keadilan 'melamar' bahaya
Malaysiakini.com
July 06, 2010**

Kementerian Dalam Negeri bersedia menyita bangunan pejabat tempat Suara Keadilan beroperasi dan kilang pencetaknya jika akhbar PKR itu terus diterbitkan tanpa permit.

"Sudah tentu boleh (ditutup)," kata Menteri Dalam Negeri, Datuk Seri Hishamuddin Hussein ketika ditanya mengenai kenyataan PKR bahawa Suara Keadilan akan terus diterbitkan.

Katanya, kenyataan pemimpin PKR itu sebagai angkuh dan bercanggah dengan peraturan.

"Tidak kira Suara Keadilan, Suara Perkasa atau mana-mana media lain mesti mengikut syarat dan peraturan sedia ada. Dalam konteks dasar, semua liputan termasuk majalah dan akhbar tabloid akan dipantau dengan lebih dekat," katanya.

Dalam kes, Suara Keadilan, Hishamuddin menjelaskan tidak timbul isu menarik semula permit penerbitan kerana yang menjadi isu pada masa ini adalah permit akhbar itu telah tamat tempoh dan permohonan untuk menyambung semula permit belum diluluskan.

Beliau berkata demikian kepada pemberita di lobi Parlimen ketika diminta mengulas kenyataan Pengarah Strategi Parti Keadilan Rakyat (PKR), Tian Chua, semalam bahawa penerbitan akhbar itu akan diteruskan.

"Keangkuhan mereka untuk meneruskan penerbitan jelas mencabar undang-undang. Ini bertentangan dengan undang-undang negara yang jatuh di bawah bidang Bahagian Kawalan Penerbitan dan Teks Al-Quran Kementerian Dalam Negeri ," katanya.

Menurut Hishammuddin kementeriannya tidak mendiskriminasi mana-mana pihak dalam soal penerbitan.